

ARUBA

Skirbi pa: Julio Maduro

Un pueblo, su historia y su cultura

Y cu esaki nos ta drenando lugarnan cu bunita nomber cu ta bai perdi den olvido, si no reviva nan. Cuminza p'ariba di e lagun unda cu Burunbundo (Burunbunu) ta situa. Awe por aprecia varios ruina di siglo pasa y comienzo di e siglo aki, cu tabata forma un bario den tempo di oro. Despues di e recesso di e promer guerra mundial e bario a worde bandona.

Ta cu alegria mester constata cu awendia a bin varios cas ey. Ta un lastima cu Gobierno no a tene cuenta cu e nombrenan cu e Arubianonan di antaño a duna su sitionan di vivienda.

Asina awe Poz Chikito y Sabana Basora ta traha den e lugar cu antes y te awe riba mapa oficial yama Weso (wesu). E tereno conoci como Weso (wesu) ta e localidad cu awendia ta keda mas o menos entre e caminda bieu y e caminda nobo, saliendo for di Spaans Lagoen y terminando na e cruz di ca-

mind. Manera ya mencionan, ignorancia y flojera a hunga un papel importante den fiamento di nombrenan. Y naturalmente tambe indiferencia.

Hopi lugar nos lo topa den e gira, unda cu nombrenan local di antaño a bai perdi. No obstante e hecho cu na "Kadaster" tin empleadonan gubernamental cu e saber y material na nan disposicion. Pero nos Gobernacion no kier haci uzo di nan talentonan.

Pesey Weso a desparce practicamente y Poz Chikito, cu de facto y en esencia ta abarca solamente e parti cu awe por ser considera como e stroki p'a zuid di e caretera, di Spaans Lagoen te na e desembocadura di Rooy Lamunchi, a bin cubri e totalidad y incluyendo Pieter Boer.

Esaki ta otro lugar cu a perde nomber y cu a ser reparti entre Sabana Basora y Poz Chikito. Si di Spaans Lagoen nos cruza entre e dos careteranan o

sea e becindario di Tele-Aruba bai p'ariba nos lo por topa cu varios cueba o pasahe subteraneo, conoci tambe como Spilon (o spelonk). Especialmente na e skina p'abay y p'anort (noord-west) di e edificio di Radio Victoria tabatin (y tin) uno basta grandi.

Ta un lastima cu varios di e cuebanan aki a ser dera bao di basura (sushi di cas) pa falta di saber, comprension y cariño patrio. Aki trobe Gobernacion ta hunga un papel bergonzoso di desinteres y indiferencia.

Na e otro banda esta na e parti costera y baranca ta duna proteccion na un playa basta grandi y relativamente seco.

Directamente p'ariba e playa di Manguel Halto (Manglo Halto) ta exhibi su santo blanco unda cu un manglar bunita ta sombra casi e totalidad. E cay (rif) cu ta core paralelo na e costa ta sirbi di proteccion pa e costa di tal forma cu aki por papia di un lagun, cu hustamente ta conoci como e

lagun di Poz Chikito. Antes e lagun aki tabatin un abundancia na varios tipo di haldo, sardin y masbango. Tambe crustacea manera calcor, palalo, concha di varios tipo y kreeft, (langosta).

Pa no lubida: varios tipo di piscar cu awe ta casi un recuerdo. Ya casi lo bo no topa cu e piscadornan cu ta taraya o ta tira reda den e lagun aki. Y e yola y botonan chikito a desparce practicamente y hunto cu nan e canasta (canastro) traha di manguel tam.

Na Manguel halto den añanan 60 hopi sorto di facilidad a worde construi pa beneficio di e bishitantenan. Pero manera tur otro parti na Aruba, vandalismo a destrui esakinan. Ta un lastima cu tanto placa y trabao a bai perdi na un sitio cu por bien por a ser un aporte pa recreacion di Pueblo y turismo.

Ta necesario splica cu e sitio aki a ser uza hopi bez pa traha peliculanan cu a duna Aruba renombre den exterior; entre nan "Pipo de Clown en het

eiland van Toen". Tambe pa finnan di propaganda a uza e belleza di e sitio unido aki.

Otro aspecto cu practicamente a desparce ta e gulidor y e plas (o tanki) di Poz Chikito. Directamente pa nort di Manguel Halto antes tabatin un cuenca den e skierpi unda cu despues di awacero un cantidad enorme di awa tabata acumula na su parti p'ariba, mientras cu e parti p'abao tabata drengtera (skerpi) y tabata filtra bai lamar. Trahamento di caretera y casnan di pueblo a cambia e ambiente por completo.

Sin embargo ainda tin un hof p'atras (pa zuid) di e school di Cucuisa (Kuk-wisa-school) pa duna testimonio di loke a bai y cu lo no bolbe mas.

Siguiendo e gira nos lo topa cu varios cas traha na fin di siglo pasa, ora cu e abundancia di guano (fosfato) na Cero Colorado y tambe procedente di e rendimiento di minanan di oro na Mira La Mar y otro lugarnan a duna trabao pa e poblacion. Esaki ta e region cu ta hustamente Poz Chikito, unda cu awa potable (mas o menos) tabata practicamente den cada cushina, pero en todo caso den tur cura di cas.

Cada lugar tin su mes caracteristica. Di Poz Chikito ta e hecho cu poznan di poco profundidad, cu tabata varia entre un pa dos braza (6 pia pa 12 pia) y hopi biaha menos di 6 pia, por a ser bora. Basta tabatin e curashi pa cobaden e skerpi bibo cu ta cubri henter e comarca aki. Hopi familia a haci uzo di e oportunidad y nos ta yega na e embocadura di Rooy Lamunchi.

Aki na su parti di zuid banda p'abao ta e sitio conoci como Isla di Oro. Y apesar cu ta trata di omitti nomber di persona, berdad y hecho aki ta obliga menciona di Sr. Gustavo Oduber, mihor conoci como Dochi Oduber.

E ta continua